

Lettre Jèrriaise 25/11/23

Bouônjour tout l'monde, ch'est Merry Bond tch' a l'pliaîsi d' vouos présenter la lettre Jèrriaise aniet, Sanm'di lé 25 dé Novembre 2023.

L'Êté pâssé, j'eus la chance dé pâsser deux mais à viagi en Août et Septembre auve man bouônhomme. Ch'tait hardi spécial viyant qué j'célébrînmes nos 25 ans d' mathiage.

Tim, auprès vîngt-siêx ans à travailli à l'églyise, fut donné un congi d'quat' mais, et ch'tait mangnifique dé pouver passer deux mais auve li.

lun d'ches mais, Septembre, 'tait dédié à visiter lé pays d'Israël et d'Chypre et j'èrtouônînmes siez nous dé Tel Aviv raiqu'huit jours d'avant qu'Israël entrîsse en dgèrre contre lé Hamas. Chutte situâtion est ravageuse des deux côtés.

Not' temps en Israël 'tait merveilleux. J'fînmes l'expéthiense dé marchi ensembly'e éyou qu' Jésus marchit, j'visitînmes les sites d'întéthet et j'lieûnmes l'Évangile dans la Terre où'est qué l's événements s'pâssîtent.

Ch'tait si bein d'aver du temps ensembl'ye et d'êchangi auve les gens qué j'rencontrînmes sus lé c'mîn.

Not' temps en Israël c'menchit en louant eune vouaituthe pour viagi jusqu'au Nord dé la mé d'Galilée. Et pis, j'passînmes chîn jours à découvri les lieux et à visiter les sites alentou la mé d'Galilée comme Caperneum, Tiberius et Nazareth.

leune des choses qué j'aimînmes lé pus, 'tait not' temps à "Nazareth Village". Chutte pliaiche fut èrbâtie d'pis l's anciennes fondâtions et i' bâtitent eune copie du village comme tchi qu'i' tait dans l'temps d'Jésus.

Il' ont des acteurs tchi jouent les rôles des gardeurs dé brébis, des potchiers, des faîtheurs dé taile, des faîtheurs dé vîn et des fèrmièrs d'olivièrs tchi chârissent la pathole dé Jésus tandis qu'ï souôngnaient les brébis et les vîngnes, griyaient les pots et l's habits, et nous montraient comment qu'ï jusaient l's olives et, comme chenna l's Écrituthes 'tait superbément illustrées et dans eune manniéthe tchi les rendait pus aîsées à comprendre.

Auve des tempéthatuthes à quarante degrés au Nord dé la Galilée, j'attendêmes fête d'aller dans l'ieau. Ch'tait du fanne à nagi dans la riviéthe Jourdain où'est qu'Jésus fut bâptîsi et y'avait des touos p'tits paîssons à gînmoler nos ortés!

J'apprêcyînmes tant l' temps qué j'pâssînmes à Jérusalem. Jérusalem 'tait spectacliéthe: ancienne, împortante et plieine dé vie et d'bieauté et auve autant d'tchultuthe et des r'ligions diverses qué nou peut s'înmaginner.

Parmi les moments împortants pour mé, ch'tait not' temps pâssé à la muthâle du Vouêt où'est qu'les gens ont prié avau les siècl'yes - j'tais êmouée par l'atmosphéthe et en viyant autant d'hommes et d'femmes tchi priyaient là. Eune aut' mémouaithe 'tait d' marchi alentou les muthâles d'l'ancienne Ville auve des veues tchi donnent sus toute la ville, ch'tait mangnifique à faithe, même s' i' fallait marchi dans des hautes tempéthatuthes! J'passînmes étout un tas d'heuthes au centre dé la priéthe dé Jérusalem. l' y' a un bieu gardîn auve d's olivyièrs, des vîngnes, des almandgièrs et des grenadièrs – eune pliaiche parfaite pour prier et pour qué les gens pièssent êt' trantchil'yes. Au centre i' y' avaient des frits dans les dgichons tch'avaient 'té tchilyis directément des bouais dans l' gardîn pour qué j'pièssons les gouôter. Ch'est un endroit espécial.

J'aimis hardi not' temps dans l'ancienne ville auve touos les halles sus châque rue et l'odeu d's êpices et l'explôtion des couleurs alentou d'nous.

Auprès deux semaines en Israël, j'viagînmes à Chypre pour rester dans eune hôtel à Pafos duthant dgiêx jours – où'est qu' Saint Paul viagit.

Ch'tait eune opporteunité pour nous dêlâsser et pour pâsser du temps à digéther tout chein qu'j'avêmes fait et veu, mais étout à r'fliéchi sus la vie et not' mathiage jusqu'au présent - à penser entouor les choses pour tchi qué j'sommes èrconnaissants, des choses tchi pouôrraient êt' amendées et chein qu'j'aim'thons faithe duthant les préchaines années d'not' vie.

J'èrtouônînmes en Israël pour les dreins jours dé nos vacances à Tel Aviv.

J'arrivînmes à Tel Aviv duthant la fête dé Yom Kippur. Pour chutte fête toutes les boutiques sont freunmées et les boulangers motorisés n' sont pon pèrmîns. Tout arrête duthant vingt-quatre heuthes. I' m'semblyait drôle à ouïe raiqu' lé son des ouaïsieux au centre dé la ville et à vaie des groupes dé jannes êfants à pédaler au mitan d'la rue auve lus pathents où'est qu' normalement i'y' éthait un tas d'traffi.

J'aimis hardi visiter Jaffa - lé port, lé pus vièr au monde. Il est bein connu pour san marchi ès puches et ses restaurants ès païssons et ch'est eune riche tapiss'sie d'couleurs et d'vie.

À la fîn d'Septembre, i' tait temps d' r'touônner siez nous. Tchil' aventuthe èrmarquabl'ye, j'sis si r'connaissante d'aver ieu chutte expéthience.

Mèrcie bein des fais pour m'aver êcoutée, à la préchaine,

Merry Bond